

國史書集

清代傳記叢書



明文書局印行

清代傳記叢刊
綜錄類
周駿富輯

國朝耆獻類徵初編

(二九)

卷一七六至
卷一八六

(清)

李桓輯



明文書局印行



國朝耆獻類徵初編卷百七十六目錄

疆臣二十八

明德

文綬

海明

何燭子裕城

--	--	--	--	--	--	--	--	--	--

155-004

國朝耆獻類徵初編卷百七十六

通奉大夫前署江西巡撫江西布政使司布政使湘陰李桓輯
疆臣二十八

明德

明德滿洲正紅旗人姓輝和氏雍正十二年由筆帖式補太常寺
博士乾隆元年授寺丞二年遷步軍統領衙門員外郎三年調戶
部緞匹庫五年遷山東糧道七年授湖南按察使八年疏言督撫
等遇刁民糾眾搶劫之案應查明是否地方官激變嚴拏究辦以
示懲創不得藉此輒劾有司徒長刁風防汛弁兵亦宜協力查拏
不得推諉觀望 諭曰國家愛養斯民惟恐一夫失所偶遇地方

歉收未嘗不籌畫接濟而刁頑之民遂乘時搶奪不可不重懲以示儆乃督撫欲自諱其化導不力禁約無方止將州縣推尋別故參劾而於搶奪之案朦混歸結又如汎弁兵丁類皆觀望不前亦豈設兵衛民本意著各督撫提鎮嚴飭所屬一同實力查拏如推諉卽嚴參議處九年四月巡撫蔣溥劾明德剛愎自用於巴陵縣生員方宣點家被盜一案意存諱飾下部議革職七月授盛京禮部郎中九月授山東兗州府知府十二年調濟南府十三年遷山東鹽運使十四年七月上以川省用兵山西軍務絡繹必得幹練之員以資任使命明德調補雁平道九月調甘肅安西道十六年遷湖北按察使十九年擢四川布政使二十年調甘肅布政

使隨總督黃廷桂往肅州辦理軍務二十一年二月授山西巡撫
六月奏言陽曲太原榆次太谷祁縣徐溝清源文水交城興縣等
十縣四季徵糧貯太原府理事通判倉卽供季支兵餉例不停緩
今該廳已徵之數及從前節次買存米豆足敷本年支放見今暫
緩俟秋後催徵竊恐下年徵支不繼仍難緩至秋成查晉省溢額
穀共五十餘萬石各屬見俱平糶於此項穀價內酌撥買米三千
石黑豆六千石以備墊支嗣後定於秋收後開徵下年供支則兵
糈旣屬有備輸將亦得從容矣十二月奏言新疆派調察哈爾吉
林等兵奉 旨將陝西糧運巴里坤山西歸化城糧運陝西接濟
竊計陝西若動撥榆林延綏等處糧由歸化城存貯軍需內運往

歸款實屬近便如動撥西安同州等處糧應於聯界之平蒲解澤
四府州屬溢額穀內撥補較爲路近省費二十二年五月奏言太
平縣史村驛明季因汾水阻隔改設曲沃縣蒙城鎮其人夫仍畱
史村汾河久西徙無礙而一驛夫馬分設未便應仍併歸史村驛
諸疏俱如所請六月調補陝西巡撫十月前任山西布政使蔣洲
虧空勒派爲巡撫塔永甯所劾上以明德前與蔣洲共事毫無
覺察竝著革職拏問命尙書劉統勳前往鞫實洲正法明德擬
絞特免明德罪發甘肅交黃廷桂差委二十三年補甘肅涼莊
道二十四年正月授甘肅巡撫二月疏言甘省辦理軍需錢價甚
昂四川河南錢多懇敕該督撥運三十萬串來甘搭放兵餉其餘

設廠平賣市價自平 從之四月丁母憂 諭賞銀千兩辦喪先
是明德在山西巡撫任內濫舉屬員楊文龍部議降二級調用又
湖北按察使任內盜案遲延補官日降三級調用至是 上以其
連年承辦軍需尙屬出力 命署甘肅按察使二十五年八月授
甘肅布政使十一月復任甘肅巡撫二十六年二月奏言嘉峪關
左右邊牆舊係土築年久殘缺新疆遣犯逃越稽查未密請用節
省運糧銀萬餘兩修固嗣後遣犯由關逃回將遊擊交部嚴加議
處又奏獲巴里坤逃犯卽於該地正法 上俱從之四月疏言各
省發遣巴里坤哈密安西三處之犯甚多安西哈密無屯係賞兵
爲奴見在兵數裁減巴里坤有屯田而糧少遣犯俱難再發應將

續到省發關展烏魯木齊屯所二處上年豐收非但有裨屯務卽各犯亦各得所又疏言甘肅地方遼闊遣犯沿途投宿坊店難以防範應將各驛閒房修二三間爲監房並責分防文武官弁稽察疎脫參處俱如所奏行二十七年五月復調山西巡撫九月奏歸化城五廳地方除托克托城已設倉貯穀外其歸化城和林格爾薩拉齊清水河四通判應請每處增設常平倉穀三萬石動用司庫耗羨銀買貯又與河東鹽政薩哈岱合疏言夏縣白沙河居民舊築堰以護田廬並爲城垣保障但土工不堅應改石工恐民力難勝請動充公銀七千餘兩及修濬姚暹渠存項銀四千兩令運司督州縣修固嗣後殘缺除北岸仍聽民修外南岸民少因歸河

東渠堰歲修案內辦理二十八年六月奏大同鎮所屬各臺從前因係邊境設兵過重今承平日久城內兵宜量裁減水泉營地方編小左有老營右有邊關均設大員重兵相距甚近請裁該營遊擊並兵百將老營守備移駐管理卽隸老營參將轄又裁靈邱路參將以所屬渾源營都司改補靈邱路都司歸北樓營參將轄靈邱路守備改補渾源營守備歸新平路參將轄俱下部議從之是月調補江西巡撫十月奏豫章書院公費不敷九江贛州兩關平餘銀及各屬城壕地租銀每年共三千餘兩除作巡撫衙門書役工食一切辦公賞兵外尚餘銀千餘兩請歸書院佐士子膏火得旨允行十一月復調補陝西巡撫三十年正月調江蘇巡撫

未莅任 命署江西巡撫五月奏兇殺多命之案請提至省城承
審官扣限兩箇月速結下部議載入例冊十一月赴江蘇任三十
一年七月奏言江蘇糧不敷食常仰給於楚蜀蘇州一帶商民每
閉糴居奇臣屢加勸諭不使復蹈前轍各屬辦案疲玩成習督催
不使堆積佐雜不得擅受民詞私作威福該省襟江帶湖大海界
連兩省劫盜尤多臣飭屬查拏立破多案崇明漁船出洋後輒肆
強劫今於口岸增兵役嚴察 上嘉其畱心時南匯山陽兩縣民
有傷父兄致死者承審官誤照過失殺問擬明德親提駁改奏革
原審各員職並劾按察使李永書不勝任請交部嚴議 諭曰向
來督撫每於臬司審轉案件往往曲爲徇隱若明德之秉公持正

何患獄獄之不平允吏治之不整飭乎明德辦理此事尙屬可嘉
著賞荷包六箇以示優獎又奏常熟縣福山塘一河爲蘇州等處
入海要津支港甚多灌民田數萬頃乾隆二十六年濬後迄今又
淤借撥司庫銀九千七百餘兩乘時再濬於所灌民田分兩年徵
收歸款從之三十三年二月調補雲南巡撫時大兵討緬甸七
月與署總督阿里衮合疏言省城至永昌邊界遠險運艱請撥藩
庫閒款銀三萬兩分設價修兩月可竣庶軍糈不致遲誤又合疏
言各隘口俱設兵如奸民私販出口兵丁得財賣放一併正法失
察官弁參革治罪能拏獲者重賞八月又合疏言永昌普洱沿邊
土司以緬匪滋擾田土多荒有乏籽種牛具者請量借給於明私

交米還項九月又合疏言滇省銅廠三十餘向係糧道專管金銀鉛廠二十九係布政司專管而本地道府無稽查責耳目未周請將各處廠務係州縣管理者責成本府專管道員稽查係廳員管理者責成本道專管統歸布政使總理糧道既不管銅廠事務太簡將驛鹽道所轄之雲南武定二府改歸專管均如所請行三十四年三月擢雲貴總督奏請牧養戰馬分派武職大員管理其棚槽草料等仍令地方官備支 上嚴飭其推諉卸責會副將軍阿里衮奏將領等所用馬行至南抵壩地方卽已疲乏 詔責明德漠視軍務漫不經心下部議革職從寬畱任尋 諭曰明德自擢任總督以來辦理諸務皆不及從前實力奮勉於養馬一事尤漫

無經理因循誤公豈宜令仍爲總督卽畱滇省亦於公事無益念
伊從前在江蘇於地方情形尙屬熟悉著卽降補江蘇巡撫時永
昌府知府趙佩以病告歸明德爲代請 上以趙佩規避革職自
備資斧效力明德遽爲代奏交部嚴加議處又以明德不能催辦
糧餉再下部嚴議應革任均得 旨寬免註冊七月經略大學士
傅恆等奏畱明德協辦軍務俟凱旋後再赴新任尋 命署雲南
巡撫專管臺站事十月 諭曰明德辦理軍需糧馬是其專責屢
經飭諭始終不能實心出力今經略大學士傅恆奏十月初一日
已抵新街會兵剋期深入而後隊繼進之兵尙未到齊前屢諭明
德令其設法催償官兵迅赴蠻暮何以至今尙未全抵軍營卽所

運糧石亦不能源源接濟辦馬一項亦自安於無能希圖置身事
外可見其平日專事空言塞責竟成疲玩痼習著革去翎頂加恩
仍署雲南巡撫以觀後效三十五年卒

右 國史館本傳